

## Toni Hendry, Sedrun

CR 1983, pag. 411



La damaun dils 15 da fenadur ha el detg siper ils ses: «Neve ch'ei tucca; ussa stoi jeu far ad ir». Ed el ha buca calau da tener ils mauns da ludaus.

Atgnamein ha ei giu num Gion Antoni; ins ha detg ad el ora ed ora Toni. Toni e nuot dapli; Toni ei stau dabia. - Toni Hendry ei naschius ils 27 da zercladur 1905 ell'ucliva da Cavorgia, la premgenitura da Barla Catrina, nata Peder, e Giachen Martin Hendry. La mumma veva spitgau vess igl affon, tertgond alla biala entschatta ch'ella hagi insumma buca da dar guoter ad enzatgi. La famiglia ei sefatga ed ins ha fatg lartg per ina gronda casada. Il Giachen Martin pinava buca mo iseglia, el cuntschava era ils calzers e las cazzettas. Dad el ha il Toni artau siu maun inschignus; el dulitgava bein e vess dau in prima mistergner.

### *El sescolescha*

Igl ei da supponer ch'il ménder da Cavorgia veva giu priu a pez il cussegli dil Giachen Martin. Per far il davondavos tarmetta ins buca il premnaschiu giu Cuera el seminari da scolasts. Siu conscolar Alfons Maissen di ch'il Toni fuvi in scolar uert ed uerbel che fagevi per camond e suandavi bein las lecziuns. El savevi esser anetgs en sia reacziun e da l'autra vart fidaus ed attaschaus sco bunamein negin.

Ils anno 1925 tuorna Toni Hendry a Cavorgia cun buns attestats e la plazza ei garantida. Ils umens dil cussegli han mess el ordvart, dadens igl uaul, enamiez ils Tarleps. A Selva ha el stuiu emprender per da detschier e dasperas ha el aunc gudignau giu las cordas da caporal. Duront la stad s'engascha el sco survigilader dalla lingia da viafier dall'Alpsu. Mo gliez quei leu fuva per cass mulin e muliniala ed enqual dils onz pli levs han perfin entschiet a mirar uiersch. Ton ch'il mat da Cavorgia fuva vegnius ualts spert in um dad aspects.

### *A Sedrun*

L'entschatta si Selva ei tuttavia buca stada fallida ed ils cussegliers ein i per el; ils scolars dalla scola superiura a Sedrun fetschien pretensiuns ed el hagi da star leu davontier. E leu eis el staus ditg davontier, 45 onns, sils scalems da differentas classas. Adina denton francs e segirs e cunscents. Sia instrucziun fuva clara e capeivla ed el deva ina buna gramatia romontscha e tudestga. En quen fuva el en mintga cass in specialist. Igl inagain e las quater operaziuns stuevan seser sco fier.

Il bab a Cavorgia era vegnius malsauns ed el sto murir avoncaduras. Al Toni ha ei tuccau da surprender il tgamun; el ei semess a per cun la mumma e siu plaid ha entschiet a valer enstagl da quel dil bab. Tschun frars e quater soras, quei fuva dabia e la plipart aunc miez miur e miez utschi. Ed el sez ha giu dad ir ordavon cun il bien exempel; quei ha el fatg ed ha rabbitschau pruamein ils raps a casa, alla famiglia che veva da basegns.

### *Ei fuva onns nauschs ed ins risdava stediamein dall'uiara.*

Sin Gonda, osum il Drun, veva il Toni cumprau ina casa resch nova e la mumma ha ugliau el da maridar. Entochen ch'el ha maridau la giuvna Barla Monn; ella ei stada ina buna consorta e mumma da ses tschun affons. Il Rico ei morts dad affon pign ed ils auters quater han tutts dau pietigot e sedostan bein egl jester. La Barla perencunter ha priu igl ur dil tschos ed ha furschau ils egls. Ella ha stuiu prender la disa ed enstagl ha ella era giu bien quitau dad els ordeifer e surtut da siu um entochen il davos, dad el che leva nungrazia ir naven e pils spitals.

### *En vischnaunca*

Forsa ch'il Toni Hendry vess saviu sefar pli fetg vitier; el ha denton buca vuliu s'avanzar e sefar valer sin vischnaunca. Enconuscheva el sesez e ses cunfins? Igl ei da crer. El saveva numdadiu buca far il leischen cun enzatgi. E perquei ch'el saveva buca far ina fatscha leischna eis el staus vid siu laisch. Buca ch'el vess snegau in survetsch a ses convischins, aschia ch'el ha da giuven enneu acceptau dallas uisas scharschas e sco president dalla cumissiun da gestiun eis el staus curaschusamein alla testa. Dil pli grond plascher ha il Toni giu da sia elecziun dad archivari dalla vischnaunca da Tujetsch. Cun in

tschaffen nundetg eis el semess vidlunder ed ha scarpliu las scartiras, nudau ils documents e cavigliau a secret tut manedlamein. El veva dapertut in uorden exemplaric ed ina scartira admirabla. Jeu tratgel che mistral Teofil Schmid hagi mess savievlamein e gestamein ils accents en siu necrolog dalla Gasetta Romontscha.

### *Igl um dalla cultura*

Toni Hendry ha giu bugen sia derivonza ed ei staus encounter la decadenza dils usits. Ch'il scolast steva da lezzas uras davontier allas uniuns, quei fuva bein da secapir e natural ed ins saveva gnanc grau persuenter. Oravontut daventa el dirigent dil chor viril e scochemai sissu ha el da surprender la direcziun dil chor da baselgia e quei ord ils mauns ferms dil farrer (da sur Giachen Antoni Fetz). Surprender e stgavo! Buca ch'ils geniturs u ils uauls da Cavorgia vessien giu dau agli duns specials sco cantadur e musicant. Alluscha gliez bein - e quei ei puspei simtomatic per Toni Hendry - cun ina premura nundetga contonscha el ina habilidad da sunar e cumprender las notas. Tgi ha nudau las uras ch'el ha studegiau las messas e las canzuns e secret entirs cudasch da notas? Jeu tratgel ch'el hagi buca desiderau ch'enzatgi demuossi agli engrazievladad. E tuttina stoい jeu dir ch'el eri fetg engrazieivels per il pli petschen plaid da renconuschientscha.


Dil Giachen Martin da Cavorgia veva el empriu da tener adaquen e negin vegn a snegar ch'el fuvi in prima quintist. Dasperas veva el e dun da lungatg. Toni ha legiu bia, tudestg e romontsch e las publicaziuns romontschas enconuscheva el da rudien. Ei fuva daveras interessant da discuorer cun el dalla litteratura. O, el veva siu mein precis e schanegiava era buca il Vic ch'el veva pigl auter ualти bugen. - Toni Hendry ha buca mo translatau Geremias Gotthelf e biars biars teaters e silsuenter fatg il regissur, el ha e sez secret ils fatgs dalla val e quels dall'ucliva e perfin dabia poesias. Lasezzas veva el adina zuppa giudem il truchet ed ei ha adina tuccau da pluminar, avon ch'el ruchegi neuadora cun enzatgei. Allura rieva el surlunder. Da sesez veva el buca in bien mein; el fuva nauschs e rigurus cun sias fleivlezias.

A ses affons ha el buca vuliu dar num Toni; a mi ha el detg repetidamein ch'ei basti cun in Toni Hendry. - Uss eis el ius naven per adina. El ha fatg lartg en casa, sin Gonda ed en vischnaunca; sias passidas san ins buca surveser. Als ses, oravontut a sia cara consorta Barla lein nus dar omisdus mauns e dir da ver curascha. Cun el sez vegli il Segner far misericordia e dar agli la pasch ch'el ha desiderau fetg.

Vic Hendry

# † Scolast Toni Hendry, Sedrun

36-7-82



En survetsch dalla scola

registrau. Lavur consciensiusa, exacata ed in custeivel relasch pils vegnentsuenter.

## Lavur culturala e famiglia

A siu temps secapev'ei da sesez, ch'il scolast s'engaschava – sper la scola – per la cultura dil vitg. Toni daventa commember dalla societad da musica e dil chor viril. Gl'onn 1933 tucca ei ad el da surprender ord ils mauns dil nunemblideivel scolast Sep Mudest Nay la bitgetta da dirigent dil chor, ch'el empeila entochen 1948 cun gronda premura e capientscha. Ensemblemen cun rev. Sur G. Ant. Fetz diregia el onns ed onns il chor-baselgia, al qual el metta' pli tard (persuls) a disposizion sias forzas entochen 1962, total plirs decennis, tut per l'amur da Diu. Sche zaco pusseivel maunca il Toni mai, seigi quei tier survetschs divins, viaspas, devoziuns e processiuns. L'undraziu sco commember d'honur ei bein meritada. Per segidar cun las uniuns e societads unfrescha el nundumbreivlas uras e seras per mussar teater.

Toni buca mo legia plunas cudaschis e scartiras. El semetta era vid il translatar e scriver. Geremias Gotthelf ei siu litterat preferiu. Differentas translaziuns d'historias e teaters dattan perdetga da si'activitad litterara. Nus possedein era pliras lavurs cultur-historicas originalas ord la plema digl autur sco: Tujetsch, notizijs historicas» (en tudestg) ni «Il vischinadi da Cavorgia» e.a. Sias descripcziuns ein claras ed entelgeivlas e dattan perdetga dil studi profund.

Toni Hendry fuva in um da mesauna grondezia cun ina fatscha marcanta, in carstgaun luvrus e religius. El veva ina urdadira e cumparsa empau resoluta, che resplendeva ina certa autoritat da sia persuna. Savens han ins forsa tratg conclusiuns fallidas da sia demanonza. Admirar stuev'ins siu maun da lavur e specialmein sia scartira fina ed eleganta.

Cun 33 onns, anno 1938, meina Toni la giuvna Barla Monn agl altar dil Segner. La lètg vegn benedida cun 5 affons, dils quals 4 ein aunc en veta. Els han bandunau la casa paterna, anflau egl jester paun e fadigia ed han leu lur canorta cun atgna famiglia. La buna consorta e mumma Barla ei restada persula a casa. Ella sa seconsolar. Ha ella gie adina giu bien quitaui da ses affons e tgirau siu Toni duront la liunga malsogna cun gronda carezia e premura. Il Segner vegn segir a remunerar tals sacrificis. Alla famiglia en malencurada exprimin nus nossa sincera condolentscha ed al car defunct detti il Tutpussent il rauas perpeten.

Sd

Suenter liunga suffrientscha mutta la mort spindrament. Quei ei era stau il cass tiel defunct Toni Hendry. Ina nauscha e greva malsogna ha sdernau igl um plein forza ed energia en peter pitir. Cun admirabla pazienzia e resignaziun ella veglia dil Segner ha el purtau il grev buordi entochen che las forzas ein stadas consumadas. Gievvia, ils 15 da fenadur 1982, ha el surdau si'olma al Scaffider, murend ruasseivlamein, bein preparaus e consolaus. – La dumengia sissu ha in grond conduct da bara accumpignau sias restonzas terrestras al davos raus sin santeri sper la baselgia da s. Vigeli. La famiglia en malencurada, parents, amitgs ed in grond diember da scolasts ed anteriurs scolars han priu cumiau dil car defunct.

## Giuventetgna e scolaziun

Sco vegl da 11 affons ei Toni Hendry naschiuss a Cavorgia/Tujetsch ils 27 da zercladur 1905. Leu passenta el cun ses geniturs Giachen Martin e Barla Catrina, nata Peder, e cun ses fargliuns ina ventireivl'affonza. Ei tucca gia baul da semetter els stadals e segidar el menaschi puril, sco pastur e fumegl. Ils habitonts da Cavorgia ein da vegi enneu stai spargnus, luvrus ed inschigneivels. Tut quei ch'era zaco pusseivel fagevan ei sez, lavurs da scrinari, da vischler, miradur ed autres.

Quei ambient amiez in pievelet prus e religius ha formau il Toni da giuven ensi. Ils emprems 4 onns dalla scola primara frequenta el a Sedrun e lodus onns a Cavorgia, che haveva da gliez temps in pulit diember d'habitants. Toni Hendry ei in premurau scolar cun bien talent e perquei sedecidan ils geniturs, malgrad ils onns maghers, da tarmetter lur fegl vegl, suenter la frequenza dalla scola secundara a Camischolas, el seminari scolastic a Cuera. Da 1921 entochen 1925 seprepara il giuven student plein entusiassem da rudien sin sia clamada. Ch'el prendeva il studi serius e schava buca per breigia, demuossan ils attestats finals.

Ils emprems quater onns da si'activitad (1925–1928/29) instruescha il giuven magister alla scola cumplessiva a Selva. Forsa perquei ch'el ha ina dira corna, sco siu frar Vic scriva a caschun digl anniversari da 70 onns, e ch'el ei secomprovaus dadens igl uaul, cloma il cussegli da scola il Toni alla scola superiura a Sedrun, nua ch'el dat scola entochen gl'onn 1945 per suenter surprender classas dalla scola inferiura. Buca meins che 49 onns stat el en survetsch dalla scola. Sch'ins seregorda, tgei locals e mieds d'instrucziun, che stevan a disposizion, ed al diember da scolars (4 classas cun quasi 50 scolars), sche capeesch'ins fetg bein, ch'ei astgava buca vegnir termagliau en scola e ch'ei duvrava scolasts cun autoritat ed in maun ferm per arrivar al success gavischau.

Adina bein preparaus ei l'instrucziun da scolast Toni intuitiva e clara. Gronda peisa metta el sillla grammatica e sil quen. Reglas ord la grammatica da pader Ursicin, igl inagin, las fracciuns cuminas e decimalas ston esser francadas ed astgan buca baluccar. Duront quellas lecziuns cun ina materia plifost schetga crodan meinsvart enqual larmin. Senza sforz negin success!

## Autras activitads ed uffecis

Cun l'avertura dalla viafier Furca-Alpsu (VFA), gl'onn 1926, vegn Toni engaschaus pil temps da stad sco survigilader da lingia. Quei ei senza dubi in'adattada occupaziun e bun'altermativa, era sche la lavur el liber ei savens dira ed unida cun responsabladad. Suenter 38 onns da survetsch (1964) seretila el sco emploiau dalla VFA per sededicar pli intensiv a siu menaschi puril. Siu bien «magnutgaura» ei ina specialitat tut aparti. Savens admir'ins il Toni, co el semudregia da fender cuscha, malgrad che la talina ei emplenida da sum entochen dem cun lenna da pegna e platta. Quei ei siu hobi. Zanua fa el plaz e ha bien uorden.

Gia els giuvens onns s'interessescha Toni Hendry dils fatgs publics e laborescha successivamein en plirs uffecis. Dapertut presta el lavur entira, seigi quei sco president dalla cumissiun da gestiun dalla vischnaanca, sco president e cassier da differentas uniuns sportivas, sco gerau militar, commember dalla cumissiun d'auas (contractivas cun NOK) ed aunc en numerusas outras scharsschas. Duront in tschappel onns eis el cassier dall'associazion dil consum general. Siu davos uffeci sco archivar communal administrescha el cun tut special plascher e quitaui. Ins sa s'imaginare cons cudaschis e tgei diember da documents e scartiras el ha legiu, sortiu e cavegliau cun tut quitaui en scatlas e sin crunas, tut bein nudau e